

RUQ'ALAJIRISAXIK CHI RUWÄCH RONOJEL RUWACH'ULEW RI RUCH'OJIB'AL RUK'ASLEN JUN WINÄQ

[Preamble]

Xa roma k'a ri kolotajik, ruq'atik ri tzi, chuqa' ri tik'asäs uxlanib'äl k'u'x chi ruwäch re ruwach'ulew, uxlaynäq k'a pa ruwi' ri nimaläj ruq'ij ruk'aslen ri winäq, chuqa' xa roma k'a ri mansachel man ewäl ruch'ojib'al kik'aslen konojel ri ach'alal ri'il chi ruwäch re ruwach'ulew;

Xa roma k'a ri man etaman ta chuqa' ri man ya'on ta ruq'ij ruch'ojib'al rul'aslen jun winäq yeb'an k'iy itzel taq b'anob'äl, nimaläj taq ch'a'oj pa ruk'u'x kik'aslen ri winäq; chuqa' xq'alajirisax chi ri nimaläj rurayb'äl ri winäq ja ri xtiril ta apo jun utziläj k'aslen ri man jun ta chik xinb'iri'il, man jun ta chik wayjal, meb'a'il, xa xtikil ta apo jun k'aslen ri akuchi' man jun oyowal, man jun ch'a'oj rejqalen rub'ixik jun na'oj chuqa' man jun ta ch'a'oj rejqalen runimaxik ri jalajöj kuqub'ab'äl taq k'u'x;

Xa roma k'a chi yalan nimaläj rejqalen ruch'ojib'al ruk'aslen jun winäq k'atzinel ruto'ik rik'in taqanel q'atb'äl tzi, richin k'a chi ri winäq manäq ta xtub'an rajäl ruk'exel roma ri tijo poqonal chuqa' ri itzel taq b'anob'äl nuk'ül pa ruk'aslen;

Xa roma k'a yalan nimaläj rejqalen rusamajixik jun utziläj ajowab'äl chi kikoöl ri juley chik taq ruwach'ulew;

Xa roma k'a ri Nima taq Ruwach'ulew kitzob'ajin ki' kikamlun rub'ixik kitzij chi rupan jun Taqanel Wuj ri kikuqub'ab'äl k'u'x pa ruwi' ri nimaläj taq ruch'ojib'al ruk'aslen ri winäq, ri nimaläj ruq'ajarik chuqa' ri ruq'ij ri winäq, chuqa' chi xa junan ruq'ij ruch'ojib'al ruk'aslen ri achin rik'in ri ixöq, chuqa' xkipab'a' ki' chunimirisaxik ri kik'ojlen chuqa' ri rutzil kiwäch ri winäq' pa rub'eyal jun qitzij kolotajik;

Xa roma k'a ri ruwa taq Rach'ulew Kachb'il ki' chuqa' ri Nima Moloj Ri'il kichin ri Ruwach'ulew Kitzob'ajin ki', xkipab'a' ki' chi ruchajixik ri qitzij ajowab'äl chuqa' ri qitzij ruch'ojib'al, ri qitzij rukolotajik kik'aslemal ri winäq' chi ruwäch ri rach'ulew;

Xa roma k'a ri xa jun ta runojib'al ruk'ojlemal re ch'ojib'äl re' rik'in ri kolotajik ja ta ri' ri xtiya' ruq'ij richin ri qitzij rusamajixik re jun utziläj samaj re' ;

Ri Nimaläj Moloj Ri'il nuya' rutzijol re Ruq'alajirisaxik chi Ruwäch Ronojel Ruwach'ulew re Ruch'ojib'al Ruk'aslen ri Winäq chi xa jun ta ri kinajib'al xtikib'an ri tinamit je' chuqa' ri ruwa taq Ruwach'ulew richin chi man xa xe ta ri winäq pa ruyonil chuqa' ri moloj taq ri'il, xtoqa ta pa kik'u'x jantape' ri ruya'ik rutzijol rik'in ri utziläj b'anob'äl chuqa' rik'in ri tijonik, rik'in ri rusamajixik re ch'ojib'äl re' chuqa' ri kolotajik, xa xtikichajij ta k'a ri rusamajixik re samaj re', xa eqal eqal ta k'a xtik'iy ri ruya'ik ruq'ij pa taq ruwach'ulew man xa xe ta ri pa taq kitinamit ri ruwa taq Ruwach'ulew kitzob'ajin ki' chuqa' xa xtisamajix ta ri pa taq ruwach'ulew e k'o pa taq kicholajen.

Mokaj jun (1)

Konojel ri winäq' kan kalaxib'en pe ri kolotajik, ri junan kiq'ij, ri junan kejqalen, junan kich'ojib'al pa kik'aslen, xa ach'el k'a ri kik'ojlen, ri kinajib'al kichajin xa tik'amun k'a chi nimaläj konojel xtikajo' ki'.

Mokaj ka' i' (2)

Konojel ri winäq' kichajin ronojel ri ch'ojinik chuqa' ri kolotajik e tz'ib'an chupan re Q'alajirisab'äl Wuj re', stape' jun wi rutzub'al ri winäq, jun wi ruch'ab'äl, jun wi runimab'al k'u'x, jun wi runojib'al chi achin chi ixöq xa b'a chike jun chik ruk'ojlen ralaxik, wi ta b'eyom, wi ta meb'a' xa junan kich'ojib'al.

Man xa xe ta k'a re', chuqa' man jun wi ta xtitz'et jun winäq xa roma ta rub'anikil jun ruwach'ulew, xa roma ta rub'eyal ruq'atb'al tzi ri ruwach'ulew chi näj chi naqaj chuqa' ri ruwach'ulew akuchi' k'o wi jun winäq, chuqa' man xa xe ta k'a chupan jun ruwach'ulew ri nusamajij ri' pa ruyonil chuqa' ri ruwach'ulew ri k'o pa kicholajen juley chik, ri man pa ruyonil nisamäj chuqa' ri jun chik ruwach'ulew niq'aton tzi pa ruwi'.

Mokaj ox i' (3)

Man jun winäq xtiq'at ta chi ruwäch ri ruk'aslen, kan ralaxib'en pe ri kolotajik chuqa' rujikirisani ri ruk'aslen.

Mokaj kaji' (4)

Man jun winäq ri xtichuq'ab'ax ta pa samaj chuqa' xtichuq'ab'ax ta chöj chi rilixik jun winäq; ri ruchuq'ab'an samaj chuqa' ri k'ayin taq winäq' xa b'a chike na rub'anikil ch'a'oj rejqalen.

Mokaj wo'o' (5)

Man jun winäq ri xtiya' ta pa tijo poqonal, pa ch'aykil chuqa' ri chöj ta xtiq'at tzi pa ruwi' chuqa' chöj ta xtuk'ül itzel ta b'anob'äl ri man ruk'amun ta nib'an chi re jun winäq.

Mokaj waqi' (6)

Ronojel winäq ütznuch'ojij xa b'a kuchi' chi ruwäch ri rach'ulew ruq'ij ri ruk'ojlen pa rucholajen ri q'atb'äl tzi.

Mokaj wuqu' (7)

Konojel ri winäq' xa junan kiq'ij chi ruwäch ri q'atb'äl tzi chuqa' xa junan kitz'etik kito'ik nub'an ri taqanel q'atb'äl tzi. Konojel xa junan kichajixik nib'an chi ruwäch ronojel ri etzelanik nuq'äj rutzij re Q'alajirisab'äl

Wuj re' chuqa' nuto' rik'in ronojel toq'onik pa ruwi' ri etzelan taq k'u'x.

Mokaj waqxaqi' (8)

Ronojel winaq k'o chi ruchajin jun utzilaj tob'al chi ruwach ri q'atb'al taq tzij pa jun ruwach'ulew, xa ruk'amun chi tito' chi ruwach ri itzel taq b'anob'al nuq'aj rutzij ri k'atzinel taq rutob'al ri winaq, ruchajin ri nimalaj taqanel wuj chuqa' ri ruchajin ri taqanel q'atb'al tzij.

Mokaj b'eleje' (9)

Man jun winaq ri choj ta xtichap, xtitz'apax ri man jun ta rumak chuqa' ri choj ta xtoqotax el pa ruruwach'ulew.

Mokaj lajuj (10)

Konojel ri winaqi' k'o chi xa junan rejqalen kiqu'ij, richin ye'ak'axax pa saqil chuqa' rik'in jun utzilaj q'atb'al tzij ri man jun utz itzel nub'an nizamaj, richin utz ruq'atik tzij nib'an chi re ri runch'ojib'al chuqa' ri k'o chi nub'an pa ruk'aslen jun winaq, chuqa' pa ruwi' xa b'a chike sujunik nib'an chi rij jun winaq chi ruwach ri q'atb'al tzij.

Mokaj julajuj (11)

Ronojel winaq ri rejqalen jun mak utz nuch'ojij chi man jun rumak ta, wi manaq q'alajnax ta wi kan ja rija' wi ri ajmak, pa ruq'a' raqan taqanel q'atb'al tzij chuqa' ri ruchojmilal nib'an pa rusaqil chi kiwach ri winaqi' chuqa' ri akuchi' q'alajirisan ronojel rutob'al ri winaq.

Man jun winaq ri xtiq'at ta tzij pa ruwi' chuqa' xtewax ta ir rumak xu taq xkulwachitaj ri b'anob'al man rejqalen ta mak chi ruwach ri ruwach'ulew chuqa' chi ruwach ri juk'an ya' ruwach'ulew. Chuqa' man jun winaq ri xtirejqalej ta chik jun nimalaj ch'a'oj ri xtik'o ta chi ruwach ri nikiq'at ri ajq'atoy tzij chupan ri ramaj pa ruwi' ri mak.

Mokaj kab' lajuj (12)

Man jun winaq ri xab'i janpe' xtuju' ta ri' pa ruk'aslen jun chik winaq, kik'in ri ralk'wal, chi rachoch chuqa' pa rutaqkil taq wuj je', chuqa' xtub'an ta itzel taq na'oj chi rij jun winaq, chuqa' chi rij ri ruq'ij ri winaq. Ronojel winaq ruchajin rutob'al ri taqen q'atb'al tzij wuj ri nich'o'n chi rij ri b'anob'al chuqa' ri rusujuxik xb'an jun winaq.

Mokaj oxlajuj (13)

Ronojel winaq xab'a kuchi' xtirajo' xtib'e wi man jun rejqalen chuqa' xab'a kuchi' na xtirajo' xtub'an wi ri rachoch chwach jun ruwach'ulew, man jun rejqalen.

Ronojel winaq utz nel el xab'a chike ruwach'ulew, chuqa' chupan ri ruwach'ulew rija' man jun rejqalen; chuqa' man jun rejqalen wi nirajo' chik nitzolin el pa ruwach'ulew.

Mokaj kajlajuj (14)

Wi jun winaq oqotan rij, utz nuch'ojij ruk'ojlen juk'an chik ruwach'ulew, utz nuk'owasaj ri ruk'aslen chi ri', xab'a chike ruwach'ulew.

Re jun ch'ojikil tzij re' man jun ruq'ij chwach ri q'atb'al tzij taq jun mak, jun b'anob'al, jun ch'a'oj kan petenax wi pa ruwi' jun qitzij mak chuqa' wi nuq'at rutzij rupixa' ri Tzob'ajin taq Ruwach'ulew.

Mokaj wolajuj (15)

Man jun winaq ri manax ta utz nirichinaj jun ramaq'il.

Man jun winaq ri choj ta xtimaq ramaq'il chuqa' xtiq'at ta chi ruwach ri amaq'il nirajo' jun winaq.

Mokaj waqlajuj (16)

Taq nik'ajolir jun ala', taq niq'opojir jun xtan man jun achike xtiq'aton kichin richin yek'ule'; man ja ta ri rutzub'al, ri ramaq'il ri runimab'al k'u'x xtiq'aton kichin richin ri k'ulb'ik, richin nitikirba'a el jun ach'alal ri'il, chuqa' xa junan kich'ojinik chi kijuunal rik'in ri k'ulb'ik, chupan ri kik'aslen taq e k'ulan chuqa' wi xtikijach ki'.

Tikirel nib'an jun k'ulb'ik wi kan qitzij rurayb'al jun xtan chuqa' rurayb'al jun ala' nik'ule'.

Ri ach'alal ri'il ja ri' ri rukowil ruk'aslen jun tzob'aj winaq, jun tinamit; re ach'alal re' k'o chi nito' nichajix koma ri winaqi' chuqa' roma ri Ruwach'ulew.

Mokaj wuqlajuj (17)

Konjel ri winaqi' tikirel nik'oje' kib'euomäl pa taq kiyonil chuqa' taq kitzob'ajin ki'.

Man jun winaq ri kan choj ta xtimaq ri rub'eyomäl chi re.

Mokaj waqxaqlajuj (18)

Man jun winaq ri xtiq'at ta chi ruwach ri runojib'al, ri nalax pa ruk'u'x chuqa' ri runimab'al k'u'x; re ch'ojikil re' ruchajin chuqa' chi man jun achike rejqalen wi ri winaq nirajo' nujal re runimab'al k'u'x ajun pa ruyonil chuqa' pa taq tzob'aj, wi ta pa saqil wi ta pan ewel, rik'in jun utzilaj tijonik, rik'in mejlen xukulen ri

nimab'äl k'u'x chuqa' ri rusamajixik.

Mokaj b'elejlajuj (19)

Man jun winäq ri xtiq'at ta chi ruwäch ri nuq'alajirisaj rub'ixik jun na'oj chuqa' ri achike nirajo' nub'ij; re ch'ojikil re' ruchajin chuqa' ri manäq ütz ta xtinaq jun winäq xa roma ta ri nuq'alajirisaj, ri nuya' rutzijol, chi näj chi naqaj chupan xa b'a chike rub'anikil ruq'alajirisaxik ri na'oj.

Mokaj juk'al (20)

Konojel winaqi' tikirel nikimöl ki' chuqa' ütz nikit Zob'ajij ki' pa rutzil.

Man jun winäq ri chöj ta nichuq'ab'äx roken pan jun moloj ri'il.

Mokaj jun rukak'al (21)

Ronojel winäq ütz nirachb'ilaj, ütz nizamäj rik'in ri tata'aj pa jun ruwach'ulew, wi man nitikir ta rija' ütz chuqa' nutäq el jun pa ruk'exel.

Konojel winaqi' xa junan kiq'ij richin ütz nikik'än jun samaj chi ruwäch ri kiruwach'ulew.

Ri kirayb'äl ri winaqi' chupan jun ruwach'ulew, ja ri' ri ruchuq'ayb'äl ruchuq'a' runojib'al ri tinamit; re rayb'äl re' niq'alajin chi kiwäch ri winaqi' taq kan ja rije' ri yek'aqon kiwäch jutaqil ri kitata'al ri ruwa taq ruwach'ulew rik'in jun utziläj rub'eyal ri cha'onik xtib'an rik'in ri pan ewel juch'un wuj.

Mokaj ka'i' rukak'al (22)

Jun winäq ri k'o pa ruq'a' raqän jun tinamit, re winäq re' k'o chi nuk'ül jikil rutob'al pa ruwi' kiq'ajarik ri winaqi' chuqa' rik'in rutob'al ri aj juk'an ya' ruwach'ulew rik'in rucholajen ruchuq'a' ri jujun Ruwach'ulew, chuyakik chuk'iyik ri utziläj kik'aslen ri winaqi' chuqa' ri kinojib'al kib'anikil, ri man sachel ruq'ij ri winäq chuqa' ri ruk'iyik ruwinaqul jun winäq.

Mokaj oxii' rukak'al (23)

Konojel winaqi' tikirel nikil jun kisamaj; chuqa' man jun winäq ri xtiq'at ta chi ruwäch ri samaj nirajo' nub'än, chuqa' man jun ütz itzel kitz'etik kitojik nib'an ri winaqi', k'atzinel chuqa' ruto'ik ri winäq rik'in ruya'ik rusamaj.

Konojel ri winaqi' xa tik'amun junan kitojik nib'an taq junan ruwäch samaj nikib'än; man jun itzel nitz'et nib'an.

Ronojel winäq samajel k'o chi niya' chi re ri qitzij rajäl ri rusamaj; ri rajäl niya' k'atzinel chi nub'än ronojel ri niraj nuk'utuj ri ruk'aslen rija' chuqa' ri ralk'wa'l; richin nuk'wa'j jun k'aslen ri ruk'amun nuchajij jun winäq; wi man xtub'än xa tik'amun nito'öx koma ri ch'aqa chik moloj taq ri'il ri yeto'on ri winaqi'.

Konojel ri winaqi' xa ruk'amun nikit Zob'ajij ki' richin ruto'ik ruk'ojlen ri winäq pa rusamaj.

Mokaj kaji' rukak'al (24)

Konojel winaqi' k'o chi niya' kuxlanib'al, ja na ri winäq ninojin achike nirajo' nub'än ri pa ruxlanib'al, chuqa' k'atzinel chi ri winäq xa etatel ri q'ij nizamäj chuqa' k'o chi nitoj jataqil ri nima kuxlanib'al niya' che jun juna' samaj.

Mokaj wo'o' rukak'al (25)

Konojel winaqi' k'o chi nikil jun utziläj k'aslen chuqa' ke ri' ri kalk'wa'l nikil ta jun ruxnaqil kiwäch chuqa' ri niraj nuk'utuj ri kik'aslen, ri kan yalan k'atzinel ja ri kiway, ri kitzyaq, ri kachoch, ri kaq'omaxik chuqa' ri ch'aqa chik k'atzinel pa kik'aslen; chuqa' k'atzinel chi niya' kitob'al taq man jun samaj ta, taq k'o yab'il, taq nikanäj küt jun winäq, taq nimalkanäj kan, tan nirijix chuqa' ch'aqa juley chik ri man niril ta chik ri nirajowaj pa ruk'aslen re tob'äl niya' taq man rik'in ta rurayb'äl ri winäq k'o nuk'ulwachij.

Ri alanik chuqa' ri k'ajol ala' k'atzinel chi ütz kichajixik, ütz kik'waxik yeb'an. Konojel ri ak'wala' ye'aläx kik'in k'ulanik taq winäq chuqa' ri ye'aläx xa xe rik'in kite' xa k'o chi konojel junan kitz'etik, junan kito'ik nikik'ül rik'in ri q'atb'äl tzij.

Mokaj waqi' rukak'al (26)

Konojel ri winäq k'atzinel chi nikik'ül ri tijonik. Re tijonik re' ja re' ri sipan tijonik nuya' ri q'atb'äl tzij pa ruwi' ri nab'ey taq wuqu' juna' tijonik chuqa' ri oxii' chik juna'. Re tijonik che re nab'ey taq juna' k'o chi nikik'ül konojel ri winaqi'. Ri tijonik richin jun samaj chuqa' ri ik'ownäq chik b'a' ruq'ij xa ruk'amun chi tataluj ri' chi kiwäch ri winaqi'; ri oken chupan ri nima'q taq tijonik xa junan rub'anikil ri niya' chi ke konojel pa ruwi' ri rejqalen retamab'al ri winäq.

Ri tijonik niya', k'atzinel chi nub'än jun utziläj samaj pa ruwi' ronojel ri niraj nuk'utuj ruk'aslen ri winäq chuqa' richin ri k'atzinel taq kolotajik rejqalen ri k'aslen; xa xtuto' ta k'a ri joyowab'äl wäch, ri koch'onik chuqa' ri ajowab'äl chi kikojol ri ruwa taq ruwach'ulew, chuqa' xtuto' ta k'a kik'ojlen konojel ri winaqi' ri kan chupan wi ri ruwach'ulew ri' e alaxnäq wi, chuqa' aj nimab'äl k'u'x, chuqa' xa xtunimirisaj ta k'a ruk'ojlen ronojel ri samaj xtikib'än ri Tzob'ajin taq Ruwach'ulew richin man sachel ruk'aslen ri tik'asäs uxlanib'äl k'u'x.

Pa kiq'a' ri tete'ej tata'aj k'o wi rucha'ik ri tijonik nikajo' nikiya' chi ke ri kalk'wa'l.

Mokaj wuqu' rukak'al (27)

Konojel ri winaqi' tikirel nikib'an xa b'a chike samaj pa ruwi' ruk'ojlen ri kitinamit, chuqa' xa tikirel nikil ri rutzil ri nima'q taq etamab'al ruchajin ri kik'ojlen chuqa' tikirel chi yesamaj pa ruwi' ruk'iyilen ri nima'q taq etamab'al chuqa' ri rutzil nikil apo rik'in.

Konojel winaqil tikirel chi keto'on pa ruwi' ri utzilaj taq na'oj, ri utzilaj taq wachinel ri utz nikichinaj xa roma ri nimalaj taq samaj, ri utzilaj k'ochinel taq samaj, ri utzilaj taq wuj rutz'ib'an jun winaq.

Mokaj waqxaqi' rukak'al (28)

Ronojel winaq tikirel nuch'ojij rucholajen jun utzilaj rub'eyal ruk'aslen chi ruwach ch'aqa chik ruwach'ulew ri akuchi' ri ch'ojikil chuqa ri kolotajik nuya' rutzijol re jun Ch'ojib'al Wuj re', xa xtib'an ta k'a ronojel ri ronojel ri nuq'alajirisaj.

Mokaj b'eleje' rukak'al (29)

Ronojel winaq k'o chi nito'on rik'in ri retamab'al, ri ruchuq'a' chi re ri rutinamit, roma kan xa xe chi ri' man jun achike xtiq'aton ronojel ri xtub'an pa ruk'aslenri winaq.

Pa rucholajen ronjel ri utz nuch'ojij jun winaq chuqa' rik'in rukusaxik ronojel niqa chi ruwach ri nub'an, ronojel winaq xa xtunimaj k'a ri utz tib'an, ri man utz ta tib'an q'alajnaj chupan ri taqanel wuj, xa roma tik'oje' pa ruk'uxlal ri ruq'ajarik chuqa' ri ruq'ij ri kik'aslen ri ch'aqa chik winaqi', chuqa' k'atzinel chi tib'an ronojel ruch'uch'ujil ri k'aslen, rucholajen ri kib'anob'al ri winaqi' chuqa' xa richin utz ruk'waxik rub'eyal kik'aslen ri winaqi' akuchi' xa junan kiq'ij konojel.

Ronojel ri utz nuch'ojij jun winaq chuqa' ri ronojel niqa chi ruwach nub'an, man jun b'ey k'a utz ta xtub'an ri nirajo' taq xa nuq'aj ri nirajowaj chuqa' ri tz'ib'atel pa kib'eyal ri Tzob'ajin taq Ruwach'ulew.

Mokaj lajuj rukak'al (30)

Man jun chi ke ronojel ri q'alajirisanik e k'o chupan re jun Q'alajirisab'al Wuj xtz'ib'ax, xa xtiq'ax ta pa kijolon chi xa nuya' ta q'ij chi re ruch'ojib'al jun ruwach'ulew, jun tzob'aj winaqi', jun winaq pa ruyonil, richin ta chi xa xtutikirb'a' xa b'a chike samaj chuqa' xtub'an xa b'a chike jun b'anob'al ri nujal ruq'ajarik ruch'ojib'al ruk'aslen jun winaq chuqa', ri nujal ruq'ajarik ri niqa chi ruwach jun winaq nub'an, ya'on rutzijol chupan re Q'alajirisab'al Wuj re'.